



Kalaallit Nunaanni Inatsisartunut qinersisarneq pillugu Inatsisartut inatsisaata allannngortinneqarnissaa pillugu Naalakkersuisut UPA 2017-imut suliniuteqaqqullugit Inatsisartut aalajangiiffigisassaattut siunnersuut. Taamaaliornikkut inatsisartunut qinersinissaq tulleg nallertinnagu Avannersuup, Ittoqqortoormiit-llu immikkut inatsisartunut qinersiveqalernissaat qulakkeersinnaaqqullugu.

(Inatsisartunut ilaasortaq Anthon Frederiksen, Partii Naleraq)

(Siullermeenera)

Demokrati kikkunnik tamanik sinniisuuffigineqartoq anguniarlugu naapertuulluinnnaqqissaartumik aqqissuussisoqarsinnaangilaq. Kisitsisitigut tamanna piviusuuvoq politikikkunngitsoq. Taamaattumik pisariaqarpoq sapinngisamik naapertuilluarnerpaamik aqqissuussinissarput imaluunniit sapinngisamik naapertuilluanninneq minnerpaaffissaaniitillugu.

Periuseq ullumi atugarput naapertorlugu imminnut qinersivinni qinigaasoqarneq ajorpoq taamaattumik partiit sassartitaat tamarmik naligiillutik sassartarput. Taamaattariaqanngilaq. Ajornanngilaq qinersiviliornissaq immikkut inatsisartunut qinersiveqarluni aamma qinigassannngortittunik tullerriiaraluni allattuilluni sassartitsinissaq, kisiannili periuseq tamanna toqqarnikuunngilarput. Qinigassannngortittut tamarmik naligiillutik sassartarnerat takusinnaavarput ullumikkut nunatsinni oqalliseriaaseqarnermi. Tamatta toqqaannartumik parteeqatigiilluta unammisaratta imminut akilersinnaanerusarpoq ingasattajaarluni isummersortarnissaq, tusaqqulluni. Tassa akiliutigisartagarput qinersisartunut aalajangertinniarlugu partiini qinigassannngortittut sorliit isissanersut.

Qinigassannngortittut tullerriiarlugit inissitsitiortortaleraluarutsigut partiit aalajangersinnaanerulissagaluarpaat sorliit salliutikkusunnerlugit. Periuseq pitsaasuunersoq ajornersorluunniit aalajangeruminaappoq. Qinersinermiit qinersinermut qinigaasartut aalaakkaanerulissagaluarput. Kisianni tamanna pitsaasuunersoq ajornersorluunniit aalajangeruminaappoq. Immaqa tamarmik ajunngitsortaqaarlutillu ajortortaqaarput.

Aammali assignanik ajornartorsiutaavoq sumiiffiit minnerit Inatsisartuni sinniisoqannginnerat. Assersuutigalugu Qaanaaq Ittoqqortoormiilu. Paarlattuanilli uani qinigaaffimmi takusinnaavagut Inatsisartunut ilaasortat pingasut Naalakkersuisunilu ilaasortaq ataaseq Tasiilameersuusut. Aappaatigut apeqquserneqarsinnaavoq sumiiffiit avinngarusimasut marluk matematik atorlugu inuup affaata missaanik isertitsisinnaasut Inatsisartuni marlunnik sinniisuutitaqassanersut



Demokraatini akueraarput demokrati eqqarsaatigalugu tamanna ajornartorsiutaasoq, taamaakkaluatorli isumaqarpugut aaqqiissutissatut tikkuarneqartoq minnerusumik demokratiskiusoq ullumikkut periutsitsinnut naleqqiullugu: Taamaattumik inassutigaarput siunnersuut itigartinneqassasoq.